

**BOSNA I HERCEGOVINA
FEDERACIJA BOSNE I HERCEGOVINE
HERCEGOVAČKO-NERETVANSKI KANTON
OPĆINSKI SUD U MOSTARU
Broj: 058-0-Su-1023/26
Mostar, 27.04.2026. godine**

Na osnovu člana 31.Zakona o sudovima u Federaciji Bosne i Hercegovine („Službene novine Federacije BiH”, broj: 38/05, 22/06, 63/10, 72/10, 7/1 3, 52/14 i 85/21, člana 8. tačka j) Pravilnika o unutrašnjem sudskom poslovanju („Službeni glasnik BiH”, broj: 66/12, 40/14, 54/17, 60/17, 30/18 i 83/22), u postupku provođenja Zakona o zaštiti ličnih podataka („Službeni glasnik BiH”, broj:12/25), predsjednik Općinskog suda u Mostaru, dana 27.04.2026. godine, donosi:

PRAVILA PRIVATNOSTI

Cilj Pravila privatnosti Općinskog suda u Mostaru (u daljem tekstu: Sud) je da, u skladu sa članom 68. Zakona o zaštiti ličnih podataka (u daljem tekstu: Zakon), svim licima čije lične podatke Sud obrađuje u okviru postupaka koje provodi, uz izuzetke propisane posebnim zakonom, pruži informacije o obradi njihovih ličnih podataka na transparentan način. Pravila privatnosti se primjenjuje na sve lične podatke koje Sud prikuplja, upotrebljava ili na drugi način obrađuje, direktno ili putem drugih kontrolora. Prema Zakonu, dole navedeni pojmovi imaju sljedeća značenja:

Lični podatak je svaki podatak koji se odnosi na fizičko lice čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatizovanim ili neautomatizovanim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prenosom, širenjem ili stavljanjem na raspolaganje na drugi način, usklađivanje ili kombinovanje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili s drugim određuje svrhe i sredstva obrade ličnih podataka.

Nadležni organ je organ koji je nadležan za sprečavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprečavanje prijetnji javnoj sigurnosti, kao i pravna lica ako su zakonom ovlaštena za obavljanje ovih poslova kao posebna kategorija.

1. Podaci o kontroloru podataka

Općinski sud u Mostaru, Maršala Tita br.94, 88104 Mostar
Tel:+ 387 36 501-100
Fax:+387 36/558-895

Službenik za zaštitu ličnih podataka:

Arneta Mušić- stručna saradnica za odnose sa javnošću-portparol suda

e-mail: arneta.music@pravosudje.ba

2. Svrha i pravni osnov za obradu ličnih podataka

Lične podatke Sud obrađuje u skladu sa Zakonom, a na osnovu nadležnosti i ovlaštenja utvrđenih Zakonom o sudovima u Federaciji Bosne i Hercegovine.

Navedene nadležnosti i ovlaštenja uključuju:

1. U krivičnim predmetima:

a) da u prvom stepenu sudi:

- za krivična djela za koja je zakonom propisana kao glavna kazna novčana kazna ili kazna zatvora do 10 godina, ako posebnim zakonom nije određena nadležnost drugog suda,
- za krivična djela za koja je posebnim zakonom određena nadležnost općinskog suda;
- za krivična djela za koja je Sud Bosne i Hercegovine prenio nadležnost na općinski sud;
- u svim krivičnim postupcima protiv maloljetnika,

b) da postupa tokom istrage i nakon podizanja optužnice u skladu sa zakonom,

c) da odlučuje o vanrednim pravnim lijekovima kad je to zakonom predviđeno,

d) da odlučuje o brisanju osude i prestanku mjera sigurnosti i pravnih posljedica osude, na osnovu sudske odluke i

e) da postupa po molbama za pomilovanje u skladu sa zakonom.

2. U građanskim predmetima da u prvom stepenu sudi:

a) u svim građanskim sporovima i

b) u vanparničnom postupku.

3. U privrednim predmetima općinski sudovi koji imaju privredna odjeljenja u prvom stepenu sude:

a) u sporovima koji se odnose na prava i obaveze po osnovu pravnog prometa roba, usluga, vrijednosnih papira, vlasničkih i drugih stvarnih prava na nekretninama, te na prava i obaveze proistekle iz vrijednosnih papira u kojima su obje stranke u postupku pravno lice ili fizičko lice koje, u svojstvu samostalnog poduzetnika ili u drugom svojstvu, obavlja privrednu ili drugu registriranu djelatnost u vidu osnovnog ili dopunskog zanimanja,

b) u sporovima koji se odnose na brodove i na plovidbu na moru i unutrašnjim vodama, te u sporovima na koje se primjenjuje plovidbeno pravo, osim sporova o prijevozu putnika,

c) u sporovima koji se odnose na avione, te u sporovima na koje se primjenjuje vazduhoplovno pravo, osim sporova o prijevozu putnika,

d) sporove iz autorskog prava, srodnih prava i prava industrijske svojine,

e) sporove nastale povodom djela za koja se tvrdi da predstavljaju neloyalnu konkurenciju ili monopolistički sporazum,

f) privredne prijestupe i

g) u postupku stečaja i likvidacije, u skladu sa zakonom, kao i u svim sporovima koji nastanu u toku i povodom provođenja postupka stečaja i likvidacije.

4. U drugim predmetima:

a) da vodi izvršni postupak, ako zakonom nije drugačije određeno,

b) da određuje mjere osiguranja, ako zakonom nije drugačije određeno,

c) da rješava u posebnim postupcima, ako zakonom nije drugačije određeno,

- d) da obavlja zemljišno-knjižne poslove u skladu sa zakonom,
- e) da pruža pravnu pomoć sudovima u Bosni i Hercegovini,
- f) da vrši poslove međunarodne pravne pomoći, ako zakonom nije određeno da neke od tih poslova vrši kantonalni sud,
- g) da vrši poslove upisa u registre pravnih lica i
- h) da vrši druge poslove određene zakonom.

Lične podatke Sud obrađuje u svrhu zakonitog, pravilnog i efikasnog obavljanja poslova iz nadležnosti suda. Pored obrade ličnih podataka radi vođenja sudskih postupaka u svim vrstama predmeta u kojima Sud ima zakonsku nadležnost, obrada ličnih podataka vrši se i u svrhu vođenja sudskih evidencija i upisnika, ostvarivanja prava stranaka, zapošljavanja, komunikacije sa strankama, saradnje sa pravosudnim i drugim institucijama, te nadležnim organima, kao i radi izvršavanja zakonskih obaveza suda u pogledu izvještavanja, statistike, arhiviranja sudskih spisa.

Temeljem zaštite legitimnih interesa, Sud može obrađivati lične podatke - evidentiranje ulaska i izlaska u zgradu Suda i provođenje video-nadzora objekta.

Obrada ličnih podataka vrši se isključivo u obimu koji je nužan za ostvarivanje navedene svrhe, uz primjenu principa obrade ličnih podataka u skladu sa čl.7 Zakona.

3. Prava nosilaca podataka u vezi s obradom ličnih podataka

Vaša prava, uz izuzetke propisane posebnim zakonom, su:

- a) pravo na pristup svojim ličnim podacima - u okviru ovog prava mogu se tražiti informacije o svrsi obrade, kategoriji ličnog podatka koji se obrađuje,
- b) pravo na ispravku ličnih podataka - pravo zahtijevati ispravljanje ili dopunjavanje netačnog ličnog podatka ako podatak nije tačan i potpun,
- c) pravo na brisanje ličnih podataka:
 - ako lični podatak više nije potreban za svrhu u koju je prikupljen ili na drugi način obrađen,
 - ako je nosilac podataka povukao saglasnost na kojoj je obrada utemeljena,
 - ako je nosilac podataka uložio prigovor na obradu u skladu sa članom 23. stav 1. Zakona i ne postoje zakonski razlozi za obradu ili je nosilac podataka uložio prigovor na obradu u skladu sa članom 23. stav 2. Zakona,
 - ako je lični podatak nezakonito obrađen,
 - ako ne postoje drugi pravni osnovi za obradu podataka.
- d) pravo na prigovor - pravo u svakom trenutku podnijeti prigovor kontroloru podataka za obradu ličnog podatka u skladu sa članom 8. stav 1. tačka e) ili f) Zakona, uključujući profiliranje utemeljeno na tim osnovama.

Izuzeci za ostvarivanje prava na brisanje:

- radi ostvarivanja prava na slobodu izražavanja i informisanja,
- radi poštivanja zakonske obaveze kojom se zahtjeva obrada propisana posebnim zakonom, a koja se primjenjuje na kontrolora podataka ili radi izvršenja zadatka koji se obavlja u javnom interesu ili u izvršenju službenih ovlasti dodijeljenih kontroloru podataka, u svrhe arhiviranja u javnom interesu, u svrhe naučnog ili historijskog istraživanja ili u statističke svrhe u skladu sa članom 56. stav 1. Zakona, u mjeri u kojoj je vjerovatno da se pravo iz stava 1. može onemogućiti ili ozbiljno ugroziti ostvarivanjem ciljeva te obrade ili radi postavljanja, ostvarivanja ili odbrane pravnih zahtjeva.

Za ostvarivanje svojih prava možete se obratiti ovom Sudu putem kontakt podataka navedenih u ovim pravilima.

4. Period čuvanja ličnih podataka

Vaše lične podatke Sud obrađuje u periodu koji je potreban da se ispuni svrha njihove obrade. Nakon prestanka svrhe u koju su prikupljeni, vaši lični podaci više se ne koriste, ali se čuvaju u arhivi onoliko vremena koliko obavezuju zakonski propisi o arhivskoj građi.

5. Tehničke i organizacione mjere zaštite ličnih podataka

Vaše lične podatke Sud obrađuje na način kojim se obezbjeđuje odgovarajuća bezbjednost i povjerljivost, kao i odgovarajuća primjena principa zakonite obrade ličnih podataka, te smanjenje količine ličnih podataka po principu neophodnosti.

Preduzete su fizičke, tehničke i organizacione mjere zaštite ličnih podataka, koje su propisane Planom sigurnosti ličnih podataka. Svi zaposleni u Sudu potpisali su izjave o povjerljivosti ličnih podataka kojima pristupaju.

6. Prenos ličnih podataka drugim kontrolorima podataka, prenos ličnih podataka u inostranstvo

Vaše lične podatke Sud može dati drugim kontrolorima ukoliko je to potrebno za izvršavanje zakonom propisanih obaveza. Također, vaše podatke Sud neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji ga obavezuje.

Vaše lične podatke Sud daje pružaocima informatičko-komunikacionih usluga s kojima je zaključio ugovor i koji poštuju pravila postupanja s ličnim podacima.

7. Korištenje kolačića i objava sadržaja na web-stranici

Objavljuvanje sudskih odluka/presuda i informativnog sadržaja na web-stranici Suda vršit će se u skladu sa zakonima BiH, poštujući princip transparentnosti rada sudova, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog.

Na našoj službenoj web stranici koriste se obavezni, odnosno tehnički kolačići (engl. cookies). Ti kolačići su male datoteke koje omogućavaju ispravan rad internet stranice i ne mogu se isključiti, te za njihovo korištenje ne treba saglasnost posjetitelja stranice. Obavezni kolačići ne pohranjuju nikakve informacije koje mogu identifikovati posjetitelja stranice.

8. Promjene Pravila privatnosti

Sud će redovno ažurirati Pravila privatnosti kako bi sadržavala tačne informacije. O svim izmjenama i dopunama vršit će se pravovremeno informiranje u skladu sa principom transparentnosti.

